

宋文宪公全集

第二函
第十一册

宋文憲公全集卷四十二

後學四明孫鏘校刊

墓誌銘五

故贈承事郎浙東道宣慰使司都元帥府都事陳府君墓誌銘

世之爲人子者。未嘗不欲顯其親。欲顯其親。唯載諸史牒。可以傳於悠久。然史法有例。非顯官貴臣及勛業殊異者。不書焉。於是往求辭章之家。採著行實。揭於墓門。及其至也。與史牒相爲表裏。庶或少慰念親者罔極之思。或者以諛墓譏之。此豈人之情也哉。台之黃巖有隱君子曰陳府君。多馴行。年六十九。以至正甲午二月某甲子卒於家。其年三月某甲子窆於縣東龍壇山後。以次子昇貴。贈浙東道宣慰使司都元帥府都事。階承事郎。昇懼府君之行弗顯於世。使其子志持

應奉翰林文字同郡楊君秉哲所爲狀來乞銘予雖非辭章者流其忍拒昇之請而拂其念親之至耶狀言陳氏本居福之侯官代有仕者至樞密直學士襄其名尤著襄字述古世稱古靈先生古靈宋慶厯中進士自浦城簿遷仙居令其子若孫因畱家焉厥後自仙居徙鄞或徙黃巖黃巖則府君之系也家乘屢毀於兵不能言其實爲幾世矣府君諱勝祖字德茂其曾祖某祖某宋朝奉郎有恂恂長者行父章甫獨守遺經朝夕潛玩視聲利事恆澹如晚歲尤能安貧竈煙或終日不起澄坐無愠色府君奮曰吾父固安貧不思具滫瀡以安親者其人子也哉於是操廢舉之方手畫心計而經營之未幾貲財漸致殷裕撫二弟甚至爲之授室嫁女弟者三於名閥一不以經父意唯日具珍饌奉之猶恐失父之歡心父

喜曰。吾有子如此。吾將含笑入地矣。人稱府君爲能孝。父旣歿。二弟求異爨。府君不能止。量其所存而三分之。曾不數年。皆蕩析無餘。子號寒而妻號飢。府君惻然曰。兄弟一氣所生。榮悴頓異。吾有目能忍見乎。乃出所受產復三分之一。人美府君爲能友。非特此也。族屬之中。若冠若婚。若喪若祭。府君無不助成之。鄉鄰有鬪者。多赴愬府君。府君喻以利害。咸欣然悅服而去。府君生平以材自負。遭時孔艱。不得展其用。當酒酣耳熱。輒登山臨水。從容嘯咏。以洩其孤憤焉。嗚呼。若府君者。其可謂有志之士非耶。府君娶阮氏。封宜人。慈柔儉勤。婦儀母道。皆可法。先一歲卒。子男二人。長敬先。甯國路涇縣主簿。次卽昇。嗜學而知文。承直郎。浙東道宣慰使司都元帥府經歷。孫男三人。長志。卽來速銘者。好讀古人書。而精於科目。

之業。孫女三人。一適同邑戴韶。餘未行。曾孫男一人。文珪。予在禁林。銘賢士大夫多矣。其績用昭著者。易於言。而潛德祕行者。難於形容也。府君有才如此。使其從政。必粲然可觀。則予之所書。極於焜煌。當不止今之所聞列而已。惜哉。銘曰。有材而無位。命也可傷。孝友行於家。孰謂非政之良。子令而仕。厥聲孔臧。於奕命書。下賁幽堂。龍壇之山。薦此銘章。過者必式。尙知爲陳府君之藏。鑾坡前集

元贈進義副尉金溪縣尉陳府君墓誌銘

予在禁林。四方賢士大夫咸辱與交。多以塚上之文爲請。予憤蘇氏矯枉過正。以銘墓爲嫌。每徇孝子慈孫之志。輒濡毫爲之。江右陳聞時。客授丞相府。亦持國子助教。曾君士勛所爲狀來謁。銘嗚呼。聞遇予特厚。何敢靳一辭。不發其先德於

幽潛耶。按狀府君諱天錫字國範姓陳氏其先出陳宣都王叔明之裔有諱伯宣者辟地泉州已而自泉徙江州之德安子孫同居十餘世旌號爲義門九世祖城又自德安徙撫州臨川之安甯鄉其里曰唐正曾大父宋鄉貢進士以忠再遷鄉之槎溪里祖鴻翼父從龍母李氏府君生三歲而孤依母夫人以居暨長氣貌雄偉不屑爲流俗嬖嬰事出言持論意度豁如也元至正十二年壬辰大盜起江漢間郡縣相繼陷聚落民爭揭竿爲旗以應寇府君頓足曰事急矣奈何卽躍馬入郡城白監郡完者帖木兒曰天錫先世以義聲著吳楚閒今天下大亂賊以紅帕首呼嘯成羣所蹴踏處絕無一人禦者天錫雖不才誓竭忠以報國家自度鄉里健兒一呼之閒可得千人甲冑糗糧當一一自給不以煩縣官教其坐作

擊刺進退之法可用。或守或攻。惟明公所命。監郡爲之驚喜。曰。此奇男子。此奇男子。卽署文牘。遣府君閒道白江西行中書時。司徒道童爲平章政事。卽從所請。獎勵者甚力。府君還朝夕聚兵。訓練如前謀。五月二十四日。帥之以援郡城。敗劇盜胡志學於城西白鷺渡。六月四日。進賢寇大掠城東桂塘。府君分兵設爲四覆。待之期。以鉦鳴爲候。伏盡起。先令騎兵餌敵。敵至卽退。三里所。賊果追擊。交戰方酣。鳴鉦一聲。伏兵突出。賊後殲戮無餘者。省憲二府益奇府君之才。檄靖安尹黃紹與府君同討賊。二十二日。府君與紹次進賢縣直隱鄉。鄉有韓家砦。寇之窟宅。堅深未易拔。雖攻以銳兵。每不利。府君欲以久困之。紹曰。鼓行氣壯。將寇是寡。公欲坐老我師耶。遽揚旗挑戰。府君止之不可。仰天歎曰。師出以律。今戰不擇。

利雖頗收不能建功。吾不知死所矣。賊見官兵新至。人馬俱疲。鼓譟爭四出。府君注矢彎弧。獨當一面。賊至輒殪之。轉鬪田間。時秋禾垂熟。馬饑亂走。府君中流矢。亟下馬拔刀與賊步戰。連斫十餘人。眾賊易府君之獨也。急趨之。府君欲退。爲禾穗所冒。遂遇害。年始五十七云。事聞。特贈金溪縣尉。階進義副尉。府君讀書務通大義。不事辭章浮藻。嘗語人曰。君子當真知實踐。喋喋空言。何補於事功。當時公卿大夫咸與之遊。而揭文安公僖斯尤號爲知己。而遠近名士若同郡孫君轍。危君素。葛君元哲。番陽李君存。祝君蕃。豫章楊君鑑。皆使諸子執贄往從之。游期學必成乃已。府君家雖豐。輕財好施。與州里有空乏者。必周卹之。未嘗有德色。聞府君之歿。識與不識。皆潛然出涕。府君夫人進賢楊氏也。諱叔真。世爲儒家。

其曾祖仲博與子龍尾同舉進士。祖天璧父居仁母支氏九歲失所恃卽歸於陳其姑鞠育之。夫人天性慈順事姑以孝聞姑年八十而終夫人亦年垂六十痛姑死幾不能喪雖丁兵戈殘毀之餘棺槨衣衾皆極其精緻且曰老姑以女遇我其歿也敢不以喪母喪姑之禮兼報之乎君子以爲賢當府君之歿夫人痛不得屍還葬欲自盡者數矣重以姑在不忍言夫人旣葬姑乃聚府君衣冠爪髮藏諸櫝中泣謂諸孤曰汝父存時吾侍巾櫛一爪一髮未嘗敢棄遺爪髮之存卽汝父體魄之存也待吾他日身歿當并冠衣與吾同穴葬庶幾後世不以汝父爲虛壙也諸孤亦泣而識之。今洪武四年辛亥七月九日夫人年七十七亦以一疾卒六年癸丑正月四日聞遵遺命合窆於烏槎原水口山祖塋之側去家不二里

而近府君生三子。長式次庸。舉茂才爲柳州路儒學正。皆先
卒。次卽聞通尙書。以文詞德行有名於時。孫男九人。曰崇先
卒。曰石。曰楔。曰謀。曰位。曰儉。曰倣。曰僊。曰鑑。孫女六人。適胡
琮。饒。鶴。萬。粹。文。彬。黎。應。辰。胡。泰。曾。孫男九人。曰括。曰援。曰鄧
曰拂。曰挺。曰回。曰授。曰拱。曰申。如曾孫女十一人。適王某王
某王。某周某某。餘幼在室。嗚呼。君子之澤。何其演迤而深長哉。
府君之先。能以義聚族而居。聲聞赫奕。光照史冊。世之相去
雖遠。子孫復能推義爲忠。期與國家殄寇。則其所志甚大。非
直欲保族里而已。其功之不成。則天也。昔人有云。作文當有
關世教。有如府君之行。其謂之無關於世教可乎。是宜銘。銘
曰。

天地大經。曰義與忠。不建人極。廓牖民衷。前聖敷訓。爲世鉅

防孰遵行之其道彌章九江有陳合族而食流澤沛滂炳煥
今昔元季政靡亂生楚疆絳巾跳跟執戈以狂有烈丈夫秉
氣飛猱嚼齒罵賊誓不俱生躍馬入城揖拜上官披陳肺肝
冒避險艱赤手一呼從者及千獸盾蛇矛勢將壓山揚旗出
逐寇駭而奔是屠是劉勇氣益振疇昧先幾謀或乖違我以
死抗我志敢隳人誰無死死能爲國不忝厥家身又遑卹其
氣之雄不隨物遷營魄來歸有風泠然爪髮雖微與四體同
旣樹而封松楸鬱蔥巫陽下招勿之四荒幽宮是藏有永其
康

鑒坡別集

故民匠提舉司知事許府君墓誌銘

濂在詞林時聞有衣冠之胄許其氏而進其名者宦游於外
不勝其思親之情春華之朝秋月之久恆至於瞻望隕涕鄉

友王內翰徵濂爲辭。以少慰其深衷。後四年。與進會南京。進乃言曰。昔者思吾父而不獲見。吾父固無恙也。而中心猶怵怵然。今父則逝矣。屢欲相從於泉臺。恐乖以死傷生之訓。輒苟存視息。以迄於今。然則何以自靖其心哉。惟墓門有石。可以鐫遺行而歆休聲。夫子嘗厚我矣。敢緣此故。稽顙再拜。以請。願夫子終惠之。謹按歐陽時中所爲狀。府君諱嗣宗。字原仲。姓許氏。其先洛陽人。有諱叔向者。仕唐爲某州刺史。生安福。令嶽胤。值黃巢亂。棄官歸袁之萍鄉。萍鄉之有許氏。自此始。安福生二子。曰宗。曰載。皆多孫子。宋時以文學自奮。爲郡僚屬。及縣令。長者前後相望。家牒燬於兵。咸無所徵。曾祖某祖季謙。某年進士。某官。父斗祐。府君生有異質。嗜學弗倦。取六經百氏。晝夜探其精微。已而嘆曰。爲學貴行。不行而能言。

雖如簇錦將何施耶益殫心家政旁及樹藝之事久之貲若
產超於前人遂以事親訓子姓爲務家西百餘步斷土爲臺
引清流遶之奇葩叢篁環列於左右襪英涼翠蓋鬱然云府
君建聚景樓其間翼以眾芳俯清天心水面諸亭幽靜軒敞
一塵弗侵府君奉板輿游其中俾童冠者隨薦紳家孺嚙羣
書孳孳弗之解稍有餘暇輒集賓朋雅歌投壺以自樂府君
曰可則可矣苟不以禮自治何以示悠久乃檣諸子冠婚喪
祭之禮肄習而行復擇並舍常稔之田五十畷焚其質劑永
收其入以供四時祀事州里之間有凶喪單窶弗自支者且
振而給之天司徒楚國歐陽文公當世大儒也義府君之爲
人結爲交友嘗寄詩以寓其意至正初當路薦爲唐州等處
民匠提舉司知事命書旣下州人士具壺觴以爲壽府君笑

曰。吾秋髮種種矣。尙何情落宦轍哉。辭弗赴。壬辰之亂。吳楚之兵。日格鬪弗休。唯萍鄉受禍最酷。父子相枕籍而死。鄉無完家。府君能先事而避。轉徙餘三十所。一門能獨安存不異承平時。及天下大定。府君退隱雙清精舍。林壑秀美。目斷無來人。府君挂頰看雲。縹緲輪囷。卷舒自如。悠然有會心處。則與高人勝士酣歌互答。有不知夕陽之在樹也。已而遭微痾。卻藥不之御。氣息奄奄。猶力疾命諸子曰。而等當以忠厚繼其家。言訖而逝。時洪武四年七月二十四日也。壽年七十有七。娶彭夫人。生四男子。庭蘭。庭秀。庭桂。庭春。庭蘭蚤世。庭桂今更名進。卽濂所爲賦思親辭者。入國朝。用上官薦。擢廣信府知事。階將仕郎。請寬賦以恤民。修學以化俗。人懷之。孫男五人。觀。恂。惠。懂。惺。越三年二月十九日。藏府君於縣之名教。

里三峯山下。惟府君之讀書。不眩其文而食其實。故以之治家。則大穰。以之奉親。則悅。而愉。以之勵子。姓則飭。以修。以之辟地。則能去危而就安。何莫非推其所學也。視彼膠固章句。資爲絺繒之辭。以譁世者。有閒矣。銘曰。

我經我舒。我已食其腠。我心之匪忤。我將還其樸。智以全其生。禮以惇其薄。有家之穰穰。有聞之章章。有子之鏘鏘。維士也良。而其行也又方。采掇其英。銘以昭其藏。鑾坡後集

元故奉訓大夫江西等處儒學提舉楊君墓誌銘

元之中世。有文章鉅公。起於浙河之間。曰鐵崖君。聲光殷殷。摩夏霄漢。吳越諸生多歸之。殆猶山之宗岱。河之走海。如是者四十餘年。乃終。瀕終。召門弟子曰。知我文最深者。唯金華宋景濂氏。我卽死。非景濂不足銘我。爾其識之。卒後三月。吏

部主事張學暨朱芾等七人奉其師之治命來請。濂旣爲位哭。復繫其爵里行系而造文曰。君姓楊氏。諱維楨。廉夫其字也。裔出漢太尉震。震二十八傳至唐。分爲四院。第二院太師虞卿生堪。堪生承休。承休生巖。五季時。錢氏有國。巖仕至丞相。自譜爲浙院巖之孫。都兵馬使洋。徙浙水東。又分爲浙左院。洋之子成。隱居會稽諸暨之陽。復爲諸暨人。君之十世祖也。高祖友振。任河南省宣議郎。曾祖文修。以善嗜義聞鄉人。呼爲楊佛子。祖敬父宏。贈奉訓大夫。知溫州路瑞安州事。飛騎尉。追封會稽縣男。妣李氏。追封會稽縣君。宋丞相宗勉四世孫也。當縣君有娠。夢月中金錢墜懷。翼日而君生。大夫公摩其頂曰。夢之祥徵。其應於爾乎。稍長。從師授春秋說。講析辯刺。幾踰百十家。大夫公期以重器。至弱齡不爲授室。俾游

學甬東。粥廩馬以益裝錢。君節縮不妄費。購黃氏日鈔諸書以歸。大夫公驩曰。此顧不多於良馬耶。躬爲裝褫。使之周覽。秦定丁卯。用春秋擢進士第。署台之天台。升階承事郎。天台多黠吏。憑陵氣勢。執官中短長。先以餌鉤其欲。然後扼其吭。使不得吐一語。號爲八鵬。君廉其姦。中以法。民方稱快。其黨頗蚓結蛇蟠。不可解。君卒。用是免官。久之。改錢清場鹽司。令時鹽賦病民。君爲食不下咽。屢白其事於江浙行中書省。弗聽。君乃頓首涕泣於庭。復不聽。至欲投印去。訖獲減引額三千。俄相繼丁外內艱。結廬於桐原墓左。族屬有酹墓者。植竹筇於前。筇發槩芽。枝葉鬱如也。自是不調銓曹者十年。會有詔修遼金宋三史。君作正統辯千言。大司徒歐陽文公玄讀之。歎曰。百年後公論定於此矣。將薦之。又有沮之者。尋用常